

Puteri Umno Minta Status Pinjaman PTPTN Mangsa Ragut Yang Kini Koma Ditukar Bernama
10 April , 2012

KOTA BAHARU, 10 April (Bernama) -- Pergerakan Puteri Umno telah menghubungi Kementerian Pengajian Tinggi mengenai status pinjaman Tabung Pendidikan Tinggi Nasional (PTPTN) bekas pelajar Politeknik Muazam Shah Pahang, Akmal Izzati Che Harun, yang koma sejak menjadi mangsa ragut pada Mei tahun lepas.

Ketua pergerakan itu, Datuk Rosnah Abdul Rashid Shirlin berkata pihaknya telah menulis surat kepada Menteri berkenaan Datuk Seri Mohamed Khaled Nordin tentang kerisauan keluarga mangsa mengenai pembayaran balik pinjaman tersebut.

"Kita telah minta kepada menteri berkenaan untuk hapuskan pinjaman tersebut atau tukarkannya kepada biasiswa, bagi membantu meringankan beban keluarga gadis tersebut," katanya kepada pemberita selepas menziarahi Akmal Izzati yang kini dirawat di Hospital Universiti Sains Malaysia (HUSM) Kubang Kerian di sini.

Akmal Izzati, 23, yang berasal dari Kampung Air Tilan Nibong Tanah Merah, koma sejak setahun lalu selepas diragut ketika menunggang motosikal seorang diri dalam perjalanan pulang ke rumah dari tempat kerja di Bukit Bunga, Tanah Merah.

Kejadian itu menyebabkan Akmal Izzati mengalami kecederaan serius di kepala dan memerlukan pembedahan.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=658250>